


মহাপৃথিবী

জীবনানন্দ দাশ



মহাপৃথিবী জীবনানন্দ দাশ

প্রথম অন্তর্জালিক সংস্করণ
১ আশ্বিন ১৪১৮ বঙ্গাব্দ
২৩ সেপ্টেম্বর ২০১১ খৃষ্টাব্দ

সংগ্রহ ও সম্পাদনা
নাবিউল আফরোজ
rnabiul@gmail.com
<http://sonnet91.blogspot.com>

অলংকরণ ও প্রচ্ছদ
চমক হাসান
chondrochari@gmail.com

সতর্কীকরণঃ- বইটি সম্পূর্ণ বিনামূল্যে বিতরণের জন্য। যেকোন ধরনের বাণিজ্যিক প্রয়াসকে
কঠোরভাবে নিরুৎসাহিত করা হলো।

মুখবন্ধ

কবি জীবনানন্দ দাশের চতুর্থ কাব্যগ্রন্থ “মহাপৃথিবী” প্রথম প্রকাশিত হয় ১৩৫১ বঙ্গাব্দে (১৯৪৪ ইংরেজি) সত্যপ্রসন্ন দত্তের ‘পূর্বাশা লিমিটেড’ থেকে। উৎসর্গপত্রে সমসাময়িক কবি-লেখক প্রেমেন্দ্র মিত্র এবং সঞ্জয় ভট্টাচার্যের নাম ছিলো।

ভূমিকায় কবি জীবনানন্দ দাশ লিখেন,

“মহাপৃথিবীর কবিতাগুলো ১৩৩৬ থেকে ১৩৪৫-৪৮ এর মাঝে রচিত হয়েছিলো; বিভিন্ন সাময়িকপত্রে বেরিয়েছে ১৩৪২ থেকে ১৩৫০ এ। বনলতা সেন এবং অন্য কয়েকটি কবিতা বার হয়েছিলো বনলতা সেন বইটিতে। বাকিসব কবিতা আজ প্রথম বইয়ের ভিতর স্থান পেলো।“

জীবনানন্দ দাশ

শ্রাবণ, ১৩৫১.

পরবর্তীতে বাংলা ১৩৭৬ সালে (বৈশাখ) মানবেন্দ্র বন্দোপাধ্যায়ের সম্পাদনায় সিগনেট প্রেস কবির জীবদ্দশায় প্রকাশিত বইয়ের ২২টি নতুন কবিতার সাথে আরো ১৭টি কবিতা যোগ করে “মহাপৃথিবী” কাব্যগ্রন্থের প্রথম সিগনেট সংস্করণ বের করে। পরবর্তীতে সিগনেটের দ্বিতীয় সংস্করণে (বাংলা ১৩৮০) বনলতা সেন থেকে গ্রহিত কবিতাগুলো এবং সেইসাথে তাদের প্রথম সংস্করণে সংযোজিত কবিতা এ দুই-ই বাদ দেয়া হয়। এই ই-বুকে সিগনেট দ্বিতীয় সংস্করণের পাঠ রক্ষা করা হয়েছে।

সুতরাং বইটিতে মোট কবিতা আছে বাইশটি। প্রকাশিত হবার ঠিক পরপরই কবি বুদ্ধদেব বসু তার পাঠপ্রতিক্রিয়ায় বলেন,


“...এ বইয়ের সবচেয়ে উল্লেখযোগ্য কবিতা ‘আট বছর আগের একদিন’। যেটি প্রথম বেরিয়েছিল সাতবছর আগে ‘কবিতা’য়। সে-সময়ে কবিতাটি পড়ে মুগ্ধ হয়েছিলাম সে মুগ্ধতা আজো ফিকে হয় নি। লাশকাটা ঘরের সেই বর্ণনাকে অভিনব বিষয়বস্তু হিসেবেই কাব্যক্ষেত্রে টেনে আনা হয় নি; আত্মঘাতী মৃতদেহকে অবলম্বন করে গড়ে উঠেছে জীবনানন্দীয় কল্পনার পরিমণ্ডল। কবিতাটি বীভৎস হতে পারতো কিন্তু হয় নি; লাশকাটা ঘর থেকে স্বপ্নলোক পর্যন্ত একটি চন্দ্রালোকিত বঙ্কিম পথ কবি ঐকে দিয়েছেন। সিন্ধু সারসে বর্ণনা সুন্দর, শব্দ সমাবেশ চিত্তহারী, কিন্তু সেগুলি সবই যেন জীবনানন্দের অন্যান্য উৎকৃষ্ট কবিতা থেকে আহরিত; সেই হিজল বন, হলুদ পাতা, হেমন্তের কুয়াশা, মেঘের দুপুরে সোনালি চিল পড়তে পড়তে এ সন্দেহ মনে উঁকি না দিয়েই পারে না যে কবি নিজেও পুনরুজ্জ্বলিত করছেন...”

এই অনুকৃতি আর পুনরুজ্জ্বলিত মনে রেখেও এ কাব্যগ্রন্থের কবিতা স্পষ্টতই দু’টি বিশেষ ভাবক্রান্ত। স্বপ্নময়তা আর বাস্তবতা ; বিদ্রোপমুখরতা আর স্বাপ্নিকবিভঙ্গতা। ‘স্বপ্ন’, ‘শব’, ‘সিন্ধুসারস’ এ কবিতাগুলো যেমন মাটির পৃথিবীকে ছাপিয়ে অনন্তে ডানা মেলবার ডাক দিয়ে যায়, তেমনি ‘আদিম দেবতারা’, ‘ইহাদেরি কানে’, ‘বলিল অশ্বখ সেই’ এর মতো কবিতায় কবি তীব্র কটাক্ষ করেন আমাদের প্রাত্যহিকতাকে। এই দুইয়ের মেলবন্ধনেই গড়ে উঠে আমাদের মহাপৃথিবী।

নাবিউল আফরোজ

সূচিপত্র

- | | |
|-----------------------|--------------------------|
| ১। নিরালোক | ১২। আদিম দেবতারা |
| ২। সিন্ধুসারস | ১৩। স্থবির যৌবন |
| ৩। ফিরে এসো | ১৪। আজকের এক মুহূর্ত |
| ৪। শ্রাবণরাত | ১৫। ফুটপাথে |
| ৫। মুহূর্ত | ১৬। প্রার্থনা |
| ৬। শহর | ১৭। ইহাদেরি কানে |
| ৭। শব | ১৮। সূর্যসাগরতীরে |
| ৮। স্বপ্ন | ১৯। মনোবীজ |
| ৯। বলিল অশ্বখ সেই | ২০। পরিচায়ক |
| ১০। আট বছর আগের একদিন | ২১। বিভিন্ন কোরাস |
| ১১। শীত রাত | ২২। প্রেম-অপ্রেমের কবিতা |



নিরালোক

একবার নক্ষত্রের দিকে চাই- একবার প্রান্তরের দিকে
আমি অনিমিখে।
ধানের ক্ষেতের গন্ধ মুছে গেছে কবে
জীবনের থেকে যেন; প্রান্তরের মতন নীরবে
বিচ্ছিন্ন খড়ের বোঝা বুকে নিয়ে ঘুম পায় তার;
নক্ষত্রেরা বাতি জ্বলে- জ্বলে- জ্বলে- 'নিভে গেলে- নিভে গেলে?'
ব'লে তারে জাগায় আবার;
জাগায় আবার।
বিস্কৃত খড়ের বোঝা বুকে নিয়ে- বুকে নিয়ে ঘুম পায় তার,
ঘুম পায় তার।

অনেক নক্ষত্রে ভ'রে গেছে সন্ধ্যার আকাশ- এই রাতের আকাশ;
এইখানে ফাল্গুনের ছায়ামাখা ঘাসে শুয়ে আছি;
এখন মরণ ভালো,- শরীরে লাগিয়া র'বে এই সব ঘাস;
অনেক নক্ষত্র র'বে চিরকাল যেন কাছাকাছি।

কে যেন উঠিল হেঁচে,- হামিদের মরখুটে কানা ঘোড়া বুঝি!
সারাদিন গাড়ি-টানা হ'লো চের,- ছুটি পেয়ে জ্যোৎস্নায় নিজ মনে খেয়ে যায় ঘাস,
যেন কোনো ব্যথা নাই পৃথিবীতে,- আমি কেন তবে মৃত্যু খুঁজি?

'কেন মৃত্যু খোঁজো তুমি?' চাপা ঠোঁটে বলে দূর কৌতুকী আকাশ।

ঝাউফলে ঘাস ভ'রে- এখানে ঝাউয়ের নিচে শুয়ে আছি ঘাসের উপরে;
কাশ আর চোরকাঁটা ছেড়ে দিয়ে ফড়িং চলিয়া গেছে ঘরে।

সন্ধ্যার নক্ষত্র, তুমি বলো দেখি কোন্ পথে কোন্ ঘরে যাবো!
কোথায় উদ্যম নাই, কোথায় আবেগ নাই,- চিন্তা স্বপ্ন ভুলে গিয়ে

শান্তি আমি পাবো?

রাতের নক্ষত্র, তুমি বলো দেখি কোন্ পথে যাবো?

‘তোমারি নিজের ঘরে চ’লে যাও’- বলিল নক্ষত্র চুপে হেসে-

‘অথবা ঘাসের ’পরে শুয়ে থাকো আমার মুখের রূপ ঠায় ভালোবেসে;

অথবা তাকায়ে দ্যাখো গরুর গাড়িটি ধীরে চ’লে যায় অন্ধকারে

সোনালি খড়ের বোঝা বুকে;

পিছে তার সাপের খোলস, নালা, খলখল অন্ধকার- শান্তি তার

রয়েছে সমুখে;

চ’লে যায় চুপে-চুপে সোনালি খড়ের বোঝা বুকে;-

যদিও মরেছে ঢের গন্ধর্ব, কিন্নর, যক্ষ,- তবু তার মৃত্যু নাই মুখে।’



সিন্ধুসারস

দু-এক মুহূর্ত শুধু রৌদ্রের সিন্ধুর কোলে তুমি আর আমি
 হে সিন্ধুসারস,
 মালাবার পাহাড়ের কোল ছেড়ে অতি দূর তরঙ্গের জানালায় নামি
 নাচিতেছ টারান্টেলা- রহস্যের; আমি এই সমুদ্রের পারে চুপে থামি
 চেয়ে দেখি বরফের মতো শাদা ডানা দু'টি আকাশের গায়
 ধবল ফেনার মতো নেচে উঠে পৃথিবীতে আনন্দ জানায়।

মুছে যায় পাহাড়ের শিঙে-শিঙে গৃধিনীর অন্ধকার গান,
 আবার ফুরায় রাত্রি, হতাশ্বাস; আবার তোমার গান করিছে নির্মাণ
 নতুন সমুদ্র এক, শাদা রৌদ্র, সবুজ ঘাসের মতো প্রাণ
 পৃথিবীর ক্লান্ত বুকে; আবার তোমার গান
 শৈলের গহ্বর থেকে অন্ধকার তরঙ্গেরে করিছে আহ্বান।

জানো কি অনেক যুগ চ'লে গেছে? ম'রে গেছে অনেক নৃপতি?
 অনেক সোনার ধান ঝ'রে গেছে জানো না কি? অনেক গহন ক্ষতি
 আমাদের ক্লান্ত ক'রে দিয়ে গেছে- হারিয়েছি আনন্দের গতি;
 ইচ্ছা, চিন্তা, স্বপ্ন, ব্যথা, ভবিষ্যৎ, বর্তমান- এই বর্তমান
 হৃদয়ে বিরস গান গাহিতেছে আমাদের- বেদনার আমরা সন্তান?

জানি পাখি, শাদা পাখি, মালাবার ফেনার সন্তান,
 তুমি পিছে চাহো নাকো, তোমার অতীত নেই, স্মৃতি নেই,
 বুকে নেই আকীর্ণ ধূসর
 পাণ্ডুলিপি; পৃথিবীর পাখিদের মতো নেই শীতরাতে
 ব্যথা আর কুয়াশার ঘর।

যে-রক্ত ঝরেছে তারে স্বপ্নে বেঁধে কল্পনার নিঃসঙ্গ প্রভাত
নেই তব; নেই নিম্নভূমি- নেই আনন্দের অন্তরালে

প্রশ্ন আর চিন্তার আঘাত।

স্বপ্ন তুমি দ্যাখোনি তো- পৃথিবীর সব পথ সব সিন্ধু ছেড়ে দিয়ে একা
বিপরীত দ্বীপে দূরে মায়াবীর আরশিতে হয় শুধু দেখা
রূপসীর সাথে এক; সন্ধ্যার নদীর ঢেউয়ে আসন্ন গল্পের মতো রেখা
প্রাণে তার- ম্লান চুল, চোখ তার হিজল বনের মতো কালো;
একবার স্বপ্নে তারে দেখে ফেলে পৃথিবীর সব স্পষ্ট আলো

নিভে গেছে যেখানে সোনার মধু ফুরিয়েছে, ক'রে না বুনন
মাছি আর; হলুদ পাতার গন্ধে ভ'রে ওঠে শালিকের মন,
মেঘের ছপূর ভাসে- সোনালি চিলের বুক হয় উন্মন
মেঘের ছপূরে, আহা, ধানসিঁড়ি নদীটির পাশে;
সেখানে আকাশে কেউ নেই আর, নেই আর পৃথিবীর ঘাসে।

তুমি সেই নিস্তব্ধতা চেনো নাকো; অথবা রক্তের পথে

পৃথিবীর ধূলির ভিতরে

জানো নাকো আজো কাঞ্চী বিদিশার মুখশ্রী মাছির মতো ঝরে;
সৌন্দর্য রাখিছে হাত অন্ধকার ক্ষুধার বিবরে;
গভীর নীলাভতম ইচ্ছা চেষ্টা মানুষের- ইন্দ্রধনু ধরিবার ক্লান্ত আয়োজন
হেমন্তের কুয়াশায় ফুরাতেছে অল্পপ্রাণ দিনের মতন।

এইসব জানো নাকো প্রবালপঞ্জর ঘিরে ডানার উল্লাসে;
রৌদ্রে ঝিলমিল করে শাদা ডানা শাদা ফেনা- শিশুদের পাশে

হেলিওট্রোপের মতো দুপুরের অসীম আকাশ!
ঝিকমিক করে রৌদ্রের বরফের মতো শাদা ডানা,
যদিও এ-পৃথিবীর স্বপ্ন চিন্তা সব তার অচেনা অজানা।
চঞ্চল শরের নীড়ে কবে তুমি- জন্ম তুমি নিয়েছিলে কবে,
বিষণ্ন পৃথিবী ছেড়ে দলে-দলে নেমেছিলে স'বে
আরব সমুদ্রে, আর চীনের সাগরে- দূর ভারতের সিন্ধুর উৎসবে।
শীতার্ঘ্য এ-পৃথিবীর আমরণ চেষ্টা ক্লাস্তি বিহ্বলতা ছিঁড়ে
নেমেছিলে কবে নীল সমুদ্রের নীড়ে।
ধানের রসের গল্প পৃথিবীর- পৃথিবীর নরম অম্বাণ
পৃথিবীর শঙ্খমালা নারী সেই- আর তার প্রেমিকের ম্লান
নিঃসঙ্গ মুখের রূপ, বিশুদ্ধ তৃণের মতো প্রাণ,
জানিবে না, কোনোদিন জানিবে না; কলরব ক'রে উড়ে যায়
শত স্নিগ্ধ সূর্য ওরা শাস্বত সূর্যের তীব্রতায়।



ফিরে এসো

ফিরে এসো সমুদ্রের ধারে,
ফিরে এসো প্রান্তরের পথে;
যেইখানে ট্রেন এসে থামে
আম নিম্ন ঝাউয়ের জগতে
ফিরে এসো; একদিন নীল ডিম করেছো বুনন;
আজো তারা শিশিরে নীরব;
পাখির ঝরনা হ'য়ে কবে
আমারে করিবে অনুভব!

শ্রাবণরাত

শ্রাবণের গভীর অন্ধকার রাতে
ধীরে ধীরে ঘুম ভেঙে যায়
কোথায় দূরে বঙ্গোপসাগরের শব্দ শুনে?

বর্ষণ অনেকক্ষণ হয় থেমে গেছে;
যত দূর চোখ যায় কালো আকাশ
মাটির শেষ তরঙ্গকে কোলে ক'রে চুপ ক'রে রয়েছে যেন;
নিস্তব্ধ হ'য়ে দূর উপসাগরের ধ্বনি শুনছে।

মনে হয়
কারা যেন বড়ো-বড়ো কপাট খুলছে,
বন্ধ ক'রে ফেলেছে আবার;
কোন্ দূর- নীরব- আকাশরেখার সীমানায়।

বালিশে মাথা রেখে যারা ঘুমিয়ে আছে
তারা ঘুমিয়ে থাকে;

কাল ভোরে জাগাবার জন্য।
যে-সব ধূসর হাসি, গল্প, প্রেম, মধুরেখা
পৃথিবীর পাথরে কঙ্কালে অন্ধকারে মিশেছিলো
ধীরে-ধীরে জেগে ওঠে তারা;
পৃথিবীর অবিচলিত পঞ্জর থেকে খসিয়ে আমাকে খুঁজে বার করে।

সমস্ত বঙ্গোপসাগরের উচ্ছ্বাস থেমে যায় যেন;
মাইলের পর মাইল মৃত্তিকা নীরব হ'য়ে থাকে।

কে যেন বলেঃ

আমি যদি সেই সব কপাট স্পর্শ করতে পারতাম

তাহ'লে এই রকম গভীর নিস্তব্ধ রাতে স্পর্শ করতাম গিয়ে।-

আমার কাঁধের উপর ঝাপসা হাত রেখে ধীরে-ধীরে আমাকে জাগিয়ে দিয়ে।

চোখ তুলে আমি

দুই স্তর অন্ধকারের ভিতর ধূসর মেঘের মতো প্রবেশ করলামঃ

সেই মুখের ভিতরে প্রবেশ করলাম।



মুহূর্ত

আকাশে জ্যোৎস্না- বনের পথে চিতা বাঘের গায়ের ঘ্রাণ;
হৃদয় আমার হরিণ যেনঃ
রাত্রির এই নীরবতার ভিতর কোন্ দিকে চলেছি!
রূপালি পাতার ছায়া আমার শরীরে,
কোথাও কোনো হরিণ নেই আর;
যত দূর যাই কাশ্ঠের মতো বাঁকা চাঁদ
শেষ সোনালি হরিণ-শস্য কেটে নিয়েছে যেন;
তারপর ধীরে-ধীরে ডুবে যাচ্ছে
শত-শত মৃগীদের চোখের ঘুমের অন্ধকারের ভিতর।

শহর

হৃদয়, অনেক বড়ো-বড়ো শহর দেখেছো তুমি;
সেই সব শহরের ইটপাথর,
কথা, কাজ, আশা, নিরাশার ভয়াবহ হাত চক্ষু
আমার মনের বিশ্বাদের ভিতর পুড়ে ছাই হয়ে গেছে।
কিন্তু তবুও শহরের বিপুল মেঘের কিনারে সূর্য উঠতে দেখেছি;
বন্দরের ওপারে সূর্যকে দেখেছি
মেঘের কমলারঙের ক্ষেতের ভিতর প্রণয়ী চাষার মতো বোঝা রয়েছে তার;
শহরের গ্যাসের আলো ও উঁচু-উঁচু মিনারের ওপরেও দেখেছি- নক্ষত্রেরা-
অজস্র বুনো হাঁসের মতো কোন দক্ষিণ সমুদ্রের দিকে উড়ে চলেছে।

শব

যেখানে রূপালি জ্যোৎস্না ভিজিতেছে শরের ভিতর,
যেখানে অনেক মশা বানায়েছে তাহাদের ঘর;
যেখানে সোনালি মাছ খুঁটে-খুঁটে খায়
সেই সব নীল মশা মৌন আকাজক্ষায়?
নির্জন মাছের রঙে যেইখানে হ'য়ে আছে চুপ
পৃথিবীর একপাশে একাকী নদীর গাঢ় রূপ;
কান্তারের একপাশে যে-নদীর জল
বাবলা হোগলা কাশে শুয়ে-শুয়ে দেখিছে কেবল
বিকালের লাল মেঘ; নক্ষত্রের রাতের আঁধারে
বিরাট নীলাভ খোঁপা নিয়ে যেন নারী মাথা নাড়ে
পৃথিবীর অন্য নদী; কিন্তু এই নদী
রাঙা মেঘ- হলুদ-হলুদ জ্যোৎস্না; চেয়ে দ্যাখো যদি;
অন্য সব আলো আর অন্ধকার এখানে ফুরালো;
লাল নীল মাছ মেঘ- ম্লান নীল জ্যোৎস্নার আলো
এইখানে; এইখানে মৃগালিনী ঘোষালের শব
ভাসিতেছে চিরদিনঃ নীল লাল রূপালি নীরব।

স্বপ্ন

পাণ্ডুলিপি কাছে রেখে ধূসর দীপের কাছে আমি
নিস্তব্ধ ছিলাম ব'সে;
শিশির পড়িতেছিল ধীরে-ধীরে খ'সে;
নিমের শাখার থেকে একাকীতম কে পাখি নামি

উড়ে গেলো কুয়াশায়,- কুয়াশার থেকে দূর-কুয়াশায় আরো।
তাহারি পাখার হাওয়া প্রদীপ নিভায়ে গেলো বুঝি?
অন্ধকার হাতড়ায় ধীরে-ধীরে দেশলাই খুঁজি;
যখন জ্বলিবে আলো কার মুখ দেখা যাবে বলতে কি পারো?

কার মুখ?- আমলকী শাখার পিছনে
শিঙের মতন বাঁকা নীল চাঁদ একদিন দেখেছিলো, তাহা;
এ ধূসর পাণ্ডুলিপি একদিন দেখেছিলো, আহা,
সে-মুখ ধূসরতম আজ এই পৃথিবীর মনে।

তবু এই পৃথিবীর সব আলো একদিন নিভে গেলে পরে,
পৃথিবীর সব গল্প একদিন ফুরাবে যখন,
মানুষ র'বে না আর, র'বে শুধু মানুষের স্বপ্ন তখনঃ
সেই মুখ আর আমি র'বো সেই স্বপ্নের ভিতরে।

বলিল অশ্বখ সেই

বলিল অশ্বখ ধীরে: ‘কোন দিকে যাবে বলো -

তোমরা কোথায় যেতে চাও?

এতদিন পাশাপাশি ছিলে, আহা, ছিলে কত কাছে:

ম্লান খোড়ো ঘরগুলো - আজও তো দাঁড়িয়ে তারা আছে;

এই সব গৃহ মাঠ ছেড়ে দিয়ে কোন দিকে কোন পথে ফের

তোমরা যেতেছো চলে পাই নাকো টের!

বোঁচকা বেঁধেছ ঢের, - ভোলো নাই ভাঙা বাটি ফুটো ঘটিটাও;

আবার কোথায় যেতে চাও?

‘পঞ্চাশ বছরও হয় হয়নিকো - এই-তো সেদিন

তোমাদের পিতামহ, বাবা, খুড়ো, জেঠামহাশয়

- আজও, আহা, তাহাদের কথা মনে হয়! -

এখানে মাঠের পারে জমি কিনে খোড়ো ঘর তুলে

এই দেশে এই পথে এই সব ঘাস ধান নিম জামরুলে

জীবনের কান্তি ক্ষুধা আকাজক্ষার বেদনার শুধেছিলো ঋণ;

দাঁড়িয়ে-দাঁড়িয়ে সব দেখেছি যে, - মনে হয় যেন সেই দিন!

‘এখানে তোমরা তবু থাকিবে না? যাবে চলে তবে কোন পথে?

সেই পথে আরও শান্তি - আরও বুঝি সাধ?

আরও বুঝি জীবনের গভীর আশ্বাদ?

তোমরা সেখানে গিয়ে তাই বুঝি বেঁধে রবে আকাজক্ষার ঘর!..

যেখানেই যাও চলে, হয় নাকো জীবনের কোনো রূপান্তর;

এক ক্ষুধা এক স্বপ্ন এক ব্যথা বিচ্ছেদের কাহিনী ধূসর

ম্লান চুলে দেখা দেবে যেখানেই বাঁধো গিয়ে আকাজক্ষার ঘর!’

- বলিল অশ্বখ সেই নড়ে-নড়ে অন্ধকারে মাথার উপর।

আট বছর আগের একদিন

শোনা গেলো লাশকাটা ঘরে
নিয়ে গেছে তারে;
কাল রাতে - ফাল্গুনের রাতের আঁধারে
যখন গিয়েছে ডুবে পঞ্চমীর চাঁদ
মরিবার হলো তার সাধ।

বধু শুয়ে ছিলো পাশে - শিশুটিও ছিলো;
প্রেম ছিলো, আশা ছিলো - জোৎস্নায়, - তবু সে দেখিল
কোন ভূত? ঘুম কেন ভেঙে গেলো তার?
অথবা হয় নি ঘুম বহুকাল - লাশকাটা ঘরে শুয়ে ঘুমায় এবার।

এই ঘুম চেয়েছিলো বুঝি !
রক্তফেনা-মাখা মুখে মড়কের হাঁদুরের মতো ঘাড় গুঁজি
আঁধার ঘুঁজির বুকে ঘুমায় এবার;
কোনোদিন জাগিবে না আর।

'কোনোদিন জাগিবে না আর
জাগিবার গাঢ় বেদনার
অবিরাম - অবিরাম ভার
সহিবে না আর - '

এই কথা বলেছিলো তারে
চাঁদ ডুবে চলে গেলে - অন্ধুত আঁধারে
যেন তার জানালার ধারে
উটের গ্রীবার মতো কোনো-এক নিস্তব্ধতা এসে।

তবুও তো প্যাঁচা জাগে;
গলিত স্ববির ব্যাং আরো দুই মুহূর্তের ভিক্ষা মাগে
আরেকটি প্রভাতের ইশারায় - অনুমেয় উষ্ণ অনুরাগে।

টের পাই যুথচারী আঁধারের গাঢ় নিরুদ্দেশে
চারিদিকে মশারির ক্ষমাহীন বিরুদ্ধতা;
মশা তার অন্ধকার সজ্জারামে জেগে থেকে জীবনের স্রোত ভালোবাসে।

রক্ত ক্লেদ বসা থেকে রৌদ্রে ফের উড়ে যায় মাছি;
সোনালি রোদের চেউয়ে উড়ন্ত কীটের খেলা কতো দেখিয়াছি।

ঘনিষ্ঠ আকাশ যেন - যেন কোন বিকীর্ণ জীবন
অধিকার করে আছে ইহাদের মন;
দূরন্ত শিশুর হাতে ফড়িঙের ঘন শিহরণ
মরণের সাথে লড়িয়াছে;
চাঁদ ডুবে গেলে পর প্রধান আঁধারে তুমি অশ্বখের কাছে
এক গাছা দড়ি হাতে গিয়েছিলে তবু একা একা;
যে জীবন ফড়িঙের, দোয়েলের - মানুষের সাথে তার হয় নাকো দেখা

এই জেনে।

অশ্বখের শাখা

করেনি কি প্রতিবাদ? জোনাকির ভিড় এসে সোনালি ফুলের স্নিগ্ধ ঝাঁকে

করেনি কি মাখামাখি?

থুরথুরে অন্ধ প্যাঁচা এসে

বলেনি কি : 'বুড়ি চাঁদ গেছে বুঝি বেনো জলে ভেসে?

চমৎকার! -

ধরা যাক দু -একটা ইঁদুর এবার!'

জানায়নি প্যাঁচা এসে এ তুমুল গাঢ় সমাচার?

জীবনের এই স্বাদ - সুপক্ব যবের ঘ্রাণ হেমন্তের বিকেলের -

তোমার অসহ্য বোধ হলো;

মর্গে কি হৃদয় জুড়োলো

মর্গে - গুমোটে

থ্যাঁতা ইঁদুরের মতো রক্তমাখা ঠোঁটে!

শোনো

তবু এ মৃতের গল্প; - কোনো

নারীর প্রণয়ে ব্যর্থ হয় নাই;

বিবাহিত জীবনের সাধ

কোথাও রাখে নি কোন খাদ,

সময়ের উর্ধ্বতনে উঠে এসে বধু

মধু - আর মননের মধু
দিয়েছে জানিতে;
হাড়হাভাতের গ্লানি বেদনার শীতে
এ জীবন কোনোদিন কেঁপে ওঠে নাই;
তাই
লাশকাটা ঘরে
চিৎ হয়ে শুয়ে আছে টেবিলের'পরে।

জানি - তবু জানি
নারীর হৃদয় - প্রেম - শিশু - গৃহ - নয় সবখানি;
অর্থ নয়, কীর্তি নয়, স্বচ্ছলতা নয় -
আরো এক বিপন্ন বিস্ময়
আমাদের অন্তর্গত রক্তের ভিতরে
খেলা করে;
আমাদের ক্লান্ত করে;
ক্লান্ত - ক্লান্ত করে;
লাশকাটা ঘরে
সেই ক্লান্তি নাই;
তাই
লাশকাটা ঘরে
চিৎ হয়ে শুয়ে আছে টেবিলের 'পরে।

তবু রোজ রাতে আমি চেয়ে দেখি, আহা,

থুরথুরে অন্ধ পেঁচা অশ্বথের ডালে বসে এসে,
চোখ পালটায়ে কয় : 'বুড়ি চাঁদ গেছে বুঝি বেনো জলে ভেসে?
চমৎকার !
ধরা যাক দু - একটা ইঁদুর এবার -'

হে প্রগাঢ় পিতামহী, আজও চমৎকার?
আমিও তোমার মতো বুড়ো হব - বুড়ি চাঁদটারে আমি করে দেব
কালীদহে বেনো জলে পার;
আমরা দুজনে মিলে শূন্য করে চলে যাব জীবনের প্রচুর ভাঁড়ার।

শীত রাত

এই সব শীতের রাতে আমার হৃদয়ে মৃত্যু আসে;
বাইরে হয়তো শিশির ঝরছে, কিংবা পাতা,
কিংবা প্যাঁচার গান; সেও শিশিরের মতো, হলুদ পাতার মতো।

শহর ও গ্রামের দূর মোহনায় সিংহের হুঙ্কার শোনা যাচ্ছে -
সার্কাসের ব্যথিত সিংহের।

এদিকে কোকিল ডাকছে - পউষের মধ্য রাতে;
কোনো-একদিন বসন্ত আসবে ব'লে?
কোনো-একদিন বসন্ত ছিলো, তারই পিপাসিত প্রচার?
তুমি স্ববির কোকিল নও? কত কোকিলকে স্ববির হ'য়ে যেতে দেখেছি,
তারা কিশোর নয়,
কিশোরী নয় আর;
কোকিলের গান ব্যবহৃত হ'য়ে গেছে।

সিংহ হুঙ্কার ক'রে উঠছে:
সার্কাসের ব্যথিত সিংহ,
স্ববির সিংহ এক - আফিমের সিংহ - অন্ধ - অন্ধকার।
চারদিককার আবছায়া-সমুদ্রের ভিতর জীবনকে স্মরণ করতে গিয়ে
মৃত মাছের পুচ্ছের শৈবালে, অন্ধকার জলে, কুয়াশার পঞ্জরে হারিয়ে যায় সব।

সিংহ অরন্যকে পাবে না আর
পাবে না আর
পাবে না আর

কোকিলের গান
বিবর্ণ এঞ্জিনের মত খ'শে খ'শে
চুম্বক পাহাড়ে নিস্তব্ধ।
হে পৃথিবী,
হে বিপাশামদির নাগপাশ, - তুমি
পাশ ফিরে শোও,
কোনোদিন কিছু খুঁজে পাবে না আর।

আদিম দেবতারা

আগুন বাতাস জল : আদিম দেবতারা তাদের সর্পিল পরিহাসে
তোমাকে দিলো রূপ-
কী ভয়াবহ নির্জন রূপ তোমাকে দিলো তারা;
তোমার সংস্পর্শের মানুষদের রক্তে দিলো মাছির মতো কামনা।

আগুন বাতাস জল : আদিম দেবতারা তাদের বঙ্কিম পরিহাসে
আমাকে দিলো লিপি রচনা করবার আবেগঃ
যেন আমিও আগুন বাতাস জল
যেন তোমাকেও সৃষ্টি করছি।

তোমার মুখের রূপ যেন রক্ত নয়, মাংস নয়, কামনা নয়,
নিশীথ-দেবদারু-দ্বীপ;
কোনো দূর নির্জন নীলাভ দ্বীপ

শূল হাতে ব্যবহৃত হ'য়ে তবু
তুমি মাটির পৃথিবীতে হারিয়ে যাচ্ছো;
আমি হারিয়ে যাচ্ছি সুদূর দ্বীপের নক্ষত্রের ছায়ার ভিতর।

আগুন বাতাস জল : আদিম দেবতারা তাদের বঙ্কিম পরিহাসে
রূপের বীজ ছড়িয়ে চলে পৃথিবীতে
ছড়িয়ে চলে স্বপ্নের বীজ।

অবাক হয়ে ভাবি

আজ রাতে কোথায় তুমি?

রূপ কেন নির্জন দেবদারু-দ্বীপের নক্ষত্রের ছায়া চেনে না-

পৃথিবীর সেই মানুষীর রূপ?

স্থূল হাতে ব্যবহৃত হ'য়ে- ব্যবহৃত -ব্যবহৃত -ব্যবহৃত -ব্যবহৃত -হয়ে
ব্যবহৃত -ব্যবহৃত -

আগুন বাতাস জল : আদিম দেবতারা হো_ হো ক'রে হেসে উঠলোঃ

‘ব্যবহৃত - ব্যবহৃত হ'য়ে শুয়োরের মাংস হয়ে যায়?’

হো হো করে হেসে উঠলাম আমি!-

চারিদিককার অউহাসির ভিতর একটা বিরাট তিমির মৃতদেহ নিয়ে

অন্ধকার সমুদ্র স্ফীত হ'য়ে উঠলো যেন;

পৃথিবীর সমস্ত রূপ অমেয় তিমির মৃত দেহের দুর্গন্ধের মতো,

যেখানেই যাই আমি সেই সব সমুদ্রের উন্মায় - উন্মায়

কেমন স্বাভাবিক, কী স্বাভাবিক!

স্ববির যৌবন

তারপর একদিন উজ্জ্বল মৃত্যুর দূত এসে
কহিবেঃ তোমারে চাই- তোমারেই,নারী;
এইসব সোনা রূপা মসলিন যুবাদের ছাড়ি
চ'লে যেতে হবে দূর আবিষ্কারে ভেসে।

বলিলাম;শুনিল সেঃ'তুমি তবু মৃত্যুর দূত নও-তুমি-'
'নগর-বন্দর ঢের খুঁজিয়াছি আমি;
তারপর তোমার এই জানালায় থামি
ধোঁয়া সব;-তুমি যেন মরীচিকা-আমি মরুভূমি-'

শীতের বাতাস নাকে চলে গেলো জানালার দিকে
পড়িল আধেক শাল বুক থেকে খসে
সুন্দর জন্তর মতো তার দেহকোষে
রক্ত শুধু দেহ শুধু শুধু হরিণীকে

বাঘের বিস্ফোভ বুকে নিয়ে নদীর কিনারে-নিম্নে-রাতে?
তবে তুমি ফিরে যাও ধোঁয়ায় আবার;
উজ্জ্বল মৃত্যুর দূত বিবর্ণ এবার-
বরং নারীকে ছেড়ে কঙ্কালের হাতে
তোমারে তুলিয়া লবে কুয়াশা-ঘোড়ায়।
তুমি এই পৃথিবীর অনাদি স্ববির;-
সোনালি মাছের মতো তবু করে ভিড়
নীল শৈবালের নিচে জলের মায়ায়

প্রেম-স্বপ্ন-পৃথিবীর স্বপ্ন প্রেম তোমার হৃদয়ে।
হে স্ববির, কী চাও বলো তো-
শাদা ডানা কোনো এক সারসের মতো?
হয়তো সে মাংস নয়-এই নারী; তবু মৃত্যু পড়ে নাই আজ তার মোহে।

তাহার ধূসর ঘোড়া চরিতেছে নদীর কিনারে
কোনো এক বিকেলের জাফরান দেশে।
কোকিল কুকুর জ্যাংঙ্গা ধুলো হয়ে গেছে কত ভেসে?
মরণের হাত ধরে স্বপ্ন ছাড়া কে বাঁচিতে পারে?

আজকের এক মুহূর্ত

হে মৃত্যু,
তুমি আমাকে ছেড়ে চলেছো ব'লে আমি খুব গভীর খুশি?
কিন্তু আরো-খানিকটা চেয়েছিলাম;
চারিদিকে তুমি হাড়ের পাহাড় বানিয়ে রেখেছো;-
যে-ঘোড়ায় চ'ড়ে আমি
অতীত-ঋষিদের সঙ্গে আকাশে নক্ষত্রে উড়ে যাবো
এইখানে মৃতবৎসা, মাতাল, ভিখারি ও কুকুরদের ভিড়ে
কোথায় তাকে রেখে দিলে তুমি?

এতদিন ব'সে পুরোনো বীজগণিতের শেষ পাতা শেষ করতে-না-করতেই
সমস্ত মিথ্যা প্রমাণিত হ'য়ে গেলো;
কোন-এক গভীর নতুন বীজগণিত যেন
পরিহাসের চোখ নিয়ে অপেক্ষা করছে;-
আবার মিথ্যা প্রমাণিত হবে ব'লে?
সে-ই শেষ সত্য ব'লে?
জীবনঃ ভারতের, চীনের, আফ্রিকার নদীপাহাড়ে বিচরণের

মৃত্যু আনন্দ নয় আর
বরং নির্ভীক বীরদের রচিত পৃথিবীর ছিদ্রে-ছিদ্রে
ইক্ষুপের মতো আটকে থাকবার শৌর্য ও আমোদঃ
তারপর চুম্বক পাহাড়ে গিয়ে নিশ্চল হবার মতো আশ্বাদ?

জীবনঃ নির্ভীক বীরদের সৌন্দর্যের আঘাতে
নিগ্রো সঙ্গীতের বেদনার ধুলোরশি?

কিন্তু এ-বেদনা আত্মিক, তার ঝাঞ্জা;- একাকীঃ তাই কিছু নয়:-
কিন্তু তিলে-তিলে আটকে থাকবার বেদনাঃ
পৃথিবীর সমস্ত কুকুর ফুটপাতে বোধ করছে আজ।
যেন এত দিনের বীজগণিত কিছু নয়,
যেন নতুন বীজগণিত নিয়ে এসেছে আকাশ!

বাংলার পাড়াগাঁয়ে শীতের জ্যোৎস্না আমি কত বার দেখলাম
কত বালিকাকে নিয়ে গেলো বাঘ- জঙ্গলের অন্ধকারে;
কতবার হটেনটট-জুলু দম্পতির প্রেমের কথাবার্তার ভিতর
আফ্রিকার সিংহকে লাফিয়ে পড়তে দেখলাম;

কিন্তু সেই সব মূঢ়তার দিন নেই আর সিংহদের;
নীলিমার থেকে সমুদ্রের থেকে উঠে এসে
পরিষ্ফুট রোদের ভিতর
উজ্জ্বল দেহ অদৃশ্য রাখে তারা;
শাদা, হলদে, লাল কালো মানুষদের
আর-কোনো শেষ বক্তব্য আছে কি না জিজ্ঞাসা করে।

যে-ঘোড়ায় চ'ড়ে আমরা অতীত-ঋষিদের সঙ্গে আকাশে নক্ষত্রে উড়ে যাবে
সেই সব শাদা-শাদা ঘোড়ার ভিড়
যেন কোন জ্যোৎস্নার নদীতে ঘিরে
নিস্তন্ধ হ'য়ে অপেক্ষা করছে কোথাও;

আমার হৃদয়ের ভিতর
সেই সুপক্ব রাত্রির গন্ধ পাই আমি।

ফুটপাথে

অনেক রাত হয়েছে-অনেক গভীর রাত হয়েছে;
 কলকাতার ফুটপাথ থেকে ফুটপাথে-ফুটপাথ থেকে ফুটপাথে-
 কয়েকটি আদিম সর্পিণী সহোদরার মতো
 এই যে ট্র্যামের লাইন ছড়িয়ে আছে
 পায়ের তলে, সমস্ত শরীরের রক্তে এদের বিষাক্ত বিষাদ স্পর্শ করে হাঁটছি আমি।
 গুঁড়ি গুঁড়ি বৃষ্টি পড়ছে- কেমন যেন ঠাণ্ডা বাতাস;
 কোন্ দূর সবুজ ঘাসের দেশ নদী জোনাকির কথা মনে পড়ে আমার,-
 তারা কোথায় তারা কি হারিয়ে গেছে?
 পায়ের তলে লিকলিকে ট্র্যামের লাইন,-মাথার উপরে অসংখ্য জটিল তারের জাল

শাসন করছে আমাকে।

গুঁড়ি গুঁড়ি বৃষ্টি পড়ছে- কেমন যেন ঠাণ্ডা বাতাস;
 এই ঠাণ্ডা বাতাসের মুখে এই কলকাতার শহরে এই গভীর রাতে
 কোনো নীল শিরার বাসাকে কাঁপতে দেখবে না তুমি;
 জলপাইয়ের পল্লবে ঘুম ভেঙে গেল বলে কোনো ঘুঘু তার,
 কোমল নীলাভ ভাঙা ঘুমের আশ্বাদ তোমাকে জানাতে আসবে না।
 হলুদ পেঁপের পাতাকে একটা আচমকা পাখি ব'লে ভুল হবে না তোমার,
 সৃষ্টিকে গহন কুয়াশা বলে বুঝতে পেরে চোখ নিবিড় হয়ে উঠবে না তোমার
 প্যাঁচা তার ধূসর পাখা আমলকির ডালে ঘষবে না এখানে,
 আমলকির শাখা থেকে নীল শিশির ঝরে পড়বে না,
 তার সুর নক্ষত্রকে লঘু জোনাকির মতো খসিয়ে আনবে না এখানে,
 রাত্রিকে নীলাভতম করে তুলবে না!
 সবুজ ঘাসের ভিতর অসংখ্য দেয়ালি পোকা ম'রে রয়েছে

দেখতে পারে না তুমি এখানে,
পৃথিবীকে মৃত সবুজ সুন্দর কোমল একটি দেয়ালি পোকাকার মতো
মনে হবে না তোমার,
জীবনকে মৃত সবুজ সুন্দর শীতল একটা দেয়ালি পোকাকার মতো
মনে হবে না;
প্যাঁচার সুর নক্ষত্রকে লঘু জোনাকির মতো খসিয়ে আনবে না এখানে,
শিশিরের সুর নক্ষত্রকে লঘু জোনাকির মতো খসিয়ে আনবে না,
সৃষ্টিকে গহন কুয়াশা বলে বুঝতে পেরে চোখ
নিবিড় হয়ে উঠবে না তোমার।

প্রার্থনা

আমাদের প্রভু বীক্ষণ দাওঃ মরি নাকি মোরা মহাপৃথিবীর তরে ?
পিরামিড যারা গড়েছিলো একদিন- আর যারা ভাঙে- গড়ে;-
মশাল যাহারা জ্বালায় যেমন জেঙ্গিস যদি হালে
দাঁড়ায় মদির ছায়ার মতন- যত অগণন মগজের কাঁচা মালে;
যে-সব ভ্রমণ শুরু হ'লো শুধু মার্কোপোলোর কালে,
আকাশের দিকে তাকায়ে মোরাও বুঝেছি যে-সব জ্যোতি
দেশলাইকাঠি নয় শুধু আর- কালপুরুষের গতি;
ডিনামাইট দিয়ে পর্বত কাটা না-হ'লে কী করে চলে,-
আমাদের প্রভু বিরতি দিয়ো না; লাখো-লাখো যুগ রতিবিহারের ঘরে
মনোবীজ দাওঃ পিরামিড গড়ে- পিরামিড ভাঙে গড়ে।

ইহাদেরি কানে

একবার নক্ষত্রের পানে চেয়ে- একবার বেদনার পানে
অনেক কবিতা লিখে চ'লে গেলো যুবকের দল;
পৃথিবীর পথে-পথে সুন্দরীরা মুর্থ সসম্মানে
শুনিল আধেক কথা;- এই সব বধির নিশ্চল
সোনার পিত্তল মূর্তিঃ তবু, আহা, ইহাদেরি কানে
অনেক ঐশ্বর্য চেলে চ'লে গেলো যুবকের দলঃ
একবার নক্ষত্রের পানে চেয়ে- একবার বেদনার পানে।

সূর্যসাগরতীরে

সূর্যের আলো মেটায় খোরাক কারঃ
সেই কথা বোঝা ভার।
অনাদি যুগের অ্যামিবার থেকে আজিকে ওদের প্রাণ
গড়িয়া উঠিল কাফ্রির মতো সূর্যসাগরতীরে
কালো চামড়ার রহস্যময় ঠাশবুনিটি ঘিরে।

চারিদিকে স্থির-ধূম্র-নিবিড় পিরামিড যদি থাকে-
অনাদি যুগের অ্যামিবার থেকে আজিকে মানবপ্রাণ
সূর্যতাড়সে ঙ্গকে যদিও করে চের ফলবান,-
তবুও আমরা জননী বলিব কাকে?
গড়িয়া উঠিল মানবের দল সূর্যসাগরতীরে
কালো আত্মার রহস্যময় ভুলের বুনি ঘিরে।

মনোবীজ

জামিরের ঘন বন অইখানে রচেছিলো কারা?
এইখানে লাগে নাই মানুষের হাত।
দিনের বেলায় যেই সমারুঢ় চিন্তার আঘাত
ইস্পাতের আশা গড়ে- সেই সব সমুজ্জ্বল বিবরণ ছাড়া

যেন আর নেই কিছু পৃথিবীতেঃ এই কথা ভেবে
যাহারা রয়েছে ঘুমে তুলোর বালিশে মাথা ঝুঁজে;
তাহারা মৃত্যুর পর জামিরের বনে জ্যোৎস্না পাবে নাকো ঝুঁজে;
বধির ইস্পাত-খড়গ তাহাদের কোলে তুলে নেবে।
সেই মুখ এখনও দিনের আলো কোলে নিয়ে করিতেছে খেলাঃ
যেন কোনো অসংগতি নেই- সব হালভাঙা জাহাজের মতো সমন্বয়
সাগরে অনেক রৌদ্র আছে ব'লে;- পরিব্যস্ত বন্দরের মতো মনে হয়
যেন এই পৃথিবীকে;- যেখানে অক্ষুশ নেই তাকে অবহেলা
করিবে সে আজো জানি;- দিনশেষে বাতুড়ের-মতন-সঞ্চারে
তারে আমি পাবো নাকো;- এই রাতে পেয়ারার ছায়ার ভিতরে
তারে নয়- স্নিগ্ধ সব ধানগন্ধী প্যাঁচাদের প্রেম মনে পড়ে।
মৃত্যু এক শান্ত ক্ষেত- সেইখানে পাবো নাকো তারে।

পৃথিবীর অলিগলি বেয়ে আমি কত দিন চলিলাম।
ঘুমালাম অন্ধকারে যখন বালিশেঃ
নোনা ধরে নাকো সেই দেয়ালের
ধূসর পালিশে
চন্দ্রমল্লিকার বন দেখিলাম
রহিয়াছে জ্যোৎস্নায় মিশে।

যেই সব বালিহাঁস ম'রে গেছে পৃথিবীতে
 শিকারির গুলির আঘাতেঃ
 বিবর্ণ গম্বুজে এসে জড়ো হয়
 আকাশের চেয়ে বড়ো রাতে;
 প্রেমের খাবার নিয়ে ডাকিলাম তারে আমি
 তবুও সে নামিল না হাতে।

পৃথিবীর বেদনার মতো ম্লান দাঁড়ালামঃ
 হাতে মৃত সূর্যের শিখা;
 প্রেমের খাবার হাতে ডাকিলাম;
 অঘ্রাণের মাঠের মৃত্তিকা
 হ'য়ে গেলো;
 নাই জ্যোৎস্না- নাই কো মল্লিকা।

সেই সব পাখি আর ফুলঃ
 পৃথিবীর সেই সব মধ্যস্থতা
 আমার ও সৌন্দর্যের শরীরের সাথে
 ম্যামির মতনও আজ কোনোদিকে নেই আর;
 সেই সব শীর্ণ দীর্ঘ মোমবাতি ফুরিয়েছে
 আছে শুধু চিন্তার আভার ব্যবহার।
 সন্ধ্যা না-আসিতে তাই
 হৃদয় প্রবেশ করে প্যাগোডার ছায়ার ভিতরে

অনেক ধূসর বই নিয়ে।

চেয়ে দেখি কোনো-এক আননের গভীর উদয়ঃ
 সে-আনন পৃথিবীর নয়।
 দু-চোখ নিমীল তার কিসের সন্ধান?
 'সোনা- নারী- তিশি- আর ধানে'-

বলিল সে: ‘কেবল মাটির জন্ম হয়।’
 বলিলাম: ‘তুমিও তো পৃথিবীর নারী,
 কেমন কুৎসিত যেন,- প্যাগোডার অন্ধকার ছাড়ি
 শাদা মেঘ-খরশান বাহিরে নদীর পারে দাঁড়াবে কি?’

‘শানিত নির্জন নদী’- বলিল সে- ‘তোমারি হৃদয়,
 যদিও তা পৃথিবীর নারী- নদী নয়:
 তোমারি চোখের স্বাদে ফুল আর পাতা
 জাগে না কি? তোমারি পায়ের নিচে মাথা
 রাখে না কি? বিশুদ্ধ- ধূসর-
 ক্রমে-ক্রমে মৃত্তিকার কৃমিদের স্তর
 যেন তারা; -অঙ্গুরা -উর্বশী
 তোমার উৎকৃষ্ট মেঘে ছিলো না কি বসি?
 ডাইনির মাংসের মতন
 আজ তার জজ্বা আর স্তন;
 বাতুড়ের খাদ্যের মতন
 একদিন হ’য়ে যাবে;
 যে-সব মাছেরা কালো মাংস খায়- তারে ছিঁড়ে খাবে।’
 কান্তারের পথে যেন সৌন্দর্যের ভূতের মতন
 তাহারে চকিত আমি করিলাম;- রোমাঞ্চিত হ’য়ে তার মন
 ব’লে গেলো: ‘তক্ষিত সৌন্দর্য সব পৃথিবীর
 উপনীত জাহাজের মাস্তুলের সুদীর্ঘ শরীর
 নিয়ে আসে একদিন, হে হৃদয়,- একদিন
 দার্শনিকও হিম হয়- প্রণয়ের সম্রাজ্ঞীরা হবে না মলিন?’
 কল্পনার অবিনাশ মহনীয় উদ্‌গিরণ থেকে
 আসিল সে হৃদয়ের। হাতে হাত রেখে
 বলিল সে। মনে হ’লো পাণ্ডুলিপি মোমের পিছনে

রয়েছে সে। একদিন সমুদ্রের কালো আলোড়নে
উপনিষদের শাদা পাতাগুলো ক্রমে ডুবে যাবে;
ল্যাম্পের আলো হাতে সেদিন দাঁড়াবে
অনেক মেধাবী মুখ স্বপ্নের বন্দরের তীরে,
যদিও পৃথিবী আজ সৌন্দর্যেরে ফেলিতেছে ছিঁড়ে।

প্রেম কি জাগায় সূর্যকে আজ ভোরে?
হয়তো জ্বালায়ে গিয়েছে অনেক- অনেক বিগত কাল,
বায়ুর ঘোড়ার খুরে যে পরায় অগ্নির মতো নাল
জানে না সে কিছু,- তবু তারে জেনে সূর্য আজিকে জ্বলে।
চীনের প্রাচীর ভেঙে যেতে-যেতে-

চীনের প্রাচীর বলেঃ

অনেক নবীন সূর্য দেখেছি রাতকানা যেন নীল আকাশের তলে;
পুরোনো শিশির আচার পাকায় আলাপী জিভের তরে;
যা-কিছু নিভৃত- ধূসর- মেধাবী- তাহাদের রক্ষা করে;
পাথরের চেয়ে প্রাচীন ইচ্ছা মানুষের মনে গড়ে।

অথবা চীনের প্রাচীরের ভুল- চেনেনি নিজের হাল;
কিংবা জ্বালায়ে গিয়েছে হয়তী অনেক বিগত কাল;
অগ্নিঘোড়ার খুরে যে পরায় জলের মতন নাল
জানে না সে কিছু,... তবু তারে জেনে সূর্য আজিকে জ্বলে;-
ববিনে জড়ানো মিশরের ম্যামি কালো বিড়ালকে বলে।

পরিচায়ক

মাঝে-মাঝে মনে হয় এ-জীবন হংসীর মতন-
 হয়তো-বা কোনো-এক কৃপণের ঘরে;
 প্রভাতে সোনার ডিম রেখে যায় খড়ের ভিতরে;
 পরিচিত বিস্ময়ের অনুভবে ক্রমে-ক্রমে দৃঢ় হয় গৃহস্থের মন।
 তাই সে হংসীরে আর চায় নাকো দুপুরে নদীর ঢালু জ'লে
 নিজেকে বিধিত ক'রে;- ক্রমে দূরে-দূরে
 হয়তো-বা মিশে যাবে অশিষ্ট মুকুরেঃ
 ছবির বইয়ের দেশে চিরকাল- ক্রুর মায়াবীর জাদুবলে।

তবুও হংসীই আভা;- হয়তো-বা পতঞ্জলি জানে।
 সোনায়-নিটোল-করা ডিম তার বিমর্ষ প্রসব।
 দুপুরে সূর্যের পানে বজ্রের মতন কলরব
 কঠে তুলে ভেসে যায় অমেয় জলের অভিযানে।
 কেয়াফুলস্নিগ্ধ হাওয়া স্থির তুলা দণ্ড প্রদক্ষিণ
 ক'রে যায়;- লোকসমাগমহীন, হিম কান্তারের পার
 ক'রে নাকো ভীতি আর মরণের অর্থ প্রত্যাহারঃ
 তবুও হংসীর পাখা তুষারের কোলাহলে আঁধারে উড্ডীন।

তবুও হংসীর প্রিয় আলোকসামান্য সুর, শূন্যতার থেকে আমি ফেঁশে
 এইখানে প্রান্তরের অন্ধকারে দাঁড়ায়েছি এসে;
 মধ্য নিশীথের এই আসন্ন তারকাদের সঙ্গ ভালোবেসে।
 মরুখুটে ঘোড়া ওই ঘাস খায়,- ঘাড়ে তার ঘায়ের উপরে
 বিনবিনে ডাঁশগুলো শিশিরের মতো শব্দ করে।
 এই স্থান, হৃদ আর, বরফের মতো শাদা ঘোড়াদের তরে

ছিলো তবু একদিন? র'বে তবু একদিন? হে কালপুরুষ,
 ধ্রুব, স্বাতী, শতভিষা,
 উচ্ছৃঙ্খল প্রবাহের মতো যারা তাহাদের দিশা
 স্থির করে কর্ণধার? - ভূতকে নিরস্ত করে প্রশান্ত সরিষা।
 ভূপৃষ্ঠের অই দিকে- জানি আমি- আমার নতুন ব্যাবিলন
 উঠেছে অনেক দূর;- শোনা যায় কর্নিশে সিংহের গর্জন।
 হয়তো-বা ধূলোসাৎ হ'য়ে গেছে এত রাতে ময়ূরবাহন।

এই দিকে বিকলাঙ্গ নদীটির থেকে পাঁচ-সাত ধনু দূরে
 মানুষ এখনও নীল , আদিম সাপুড়ে:
 রক্ত আর মৃত্যু ছাড়া কিছু পার নাকো তারা খনিজ , অমূল্য মাটি খুঁড়ে।

এই সব শেষ হ'ইয়ে যাবে তবু একদিন;- হয়তো-বা ক্রান্ত ইতিহাস
 শানিত সাপের মতো অন্ধকারে নিজেকে করেছে প্রায় গ্রাস।
 ক্রমে এক নিস্তব্ধতাঃ নীলাভ ঘাসের ফুলে সৃষ্টির বিন্যাস

আমাদের হৃদয়কে ক্রমেই নীরব হ'তে বলে।
 যে-টেবিল শেষরাতে দোভাষীর- মাঝরাতে রাষ্ট্রভাষাভাষীর দখলে
 সেই সব বহু ভাষা শিখে তবু তারকার সন্তপ্ত অনলে

হাতের আয়ুর রেখা আমাদের জ্বলে আজো ভৌতিক মুখের মতন ;
 মাথার সকল চুল হ'য়ে যায় ধূসর- ধূসরতম শণ;
 লোষ্ট্র, আমি, জীব আর নক্ষত্র অনাদি বিবর্ণ বিবরণ
 বিদূষক বামনের মতো হেসে একবার চায় শুধু হৃদয় জুড়াতে।
 ফুরফুরে আঙনের খান তবু কাঁচিছাঁটা জামার মতন মুক্ত হাতে
 তাহার নগ্নতা ঘিরে জ্ব'লে যায়- সে কোথাও পারে না দাঁড়াতে।

নীলিমাকে যতদূর শান্ত নির্মল মনে হয়
হয়তো-বা সে-রকম নেই তার মহানুভবতা।
মানুষ বিশেষ-কিছু চায় এই পৃথিবীতে এসে
অতীব গরিমাভরে ব'লে যায় কথা;
যেন কোমো ইন্দ্রধনু পেয়ে গেলে খুশি হ'তো মন।
পৃথিবীর ছোট-বড়ো দিনের ভিতর দিয়ে অবিরাম চ'লে
অনেক মুহূর্ত আমি এ-রকম মনোভাব করেছি পোষণ।

দেখেছি সে-সব দিনে নরকের আগুনের মতো অহরহ রক্তপাত;
সে-আগুন নিভে গেলে সে-রকম মহৎ আঁধার,
সে-আঁধারে দুহিতারা গেয়ে যায় নীলিমার গান;
উঠে আসে প্রভাতের গোখুলির রক্তচ্ছটা-রঞ্জিত ভাঁড়।

সে-আলোকে অরণ্যের সিংহকে ফিকে মরুভূমি মনে হয়;
মধ্য সমুদ্রের রোল-মনে হয়-দয়াপরবশ;
এরাও মহৎ- তবু মানুষের মহাপ্রতিভার মতো নয়।

আজ এই শতাব্দীর পুনরায় সেই সব ভাস্বর আগুন
কাজ ক'রে যায় যদি মানুষ ও মনীষী ও বৈহাসিক নিয়ে-
সময়ের ইশারায় অগণন ছায়া-সৈনিকেরা
আগুনের দেয়ালকে প্রতিষ্ঠিত করে যদি উনুনের অতলে দাঁড়িয়ে,

দেওয়ালের 'পরে যদি বানর, শেয়াল, শনি, শকুনের ছায়ার জীবন
জীবন্ধে টিটকারি দিয়ে যায় আগুনের রঙ আরো বিভাসিত হ'লে-
গর্ভাঙ্কে ও অঙ্কে কান কেটে-কেটে নাটকের হয় তবু শ্রুতিবিশোধন।

বিভিন্ন কোরাস

এক

আমাদের হৃদয়ের নদীর উপর দিয়ে ধীরে
এখনো যেতেছে চ'লে কয়েকটি শাদা রাজহাঁস;
সহধর্মিনীর সাথে ঢের দিন- আরো ঢের দিন
করেছি শান্তিতে বসবাস;

দেখেছি সন্তানদের ময়দানে আলোর ভিতরে
স্বতই ছড়ায়ে আছে- যেমন গুনেছি টায়-টায়;
অদ্ভুত ভিড়ের দিকে চেয়ে থেকে দেখে গেছি জনতার মাথা
গৃহদেবতাকে দেখে শৃঙ্গ শিলায়।

নগরীর পিতামহদের ছবি দেয়ালে টাঙায়ে-
টাঙায়েছি নগরীর পিতাদের ছবি;
পরিক্রমণে গিয়ে সর্বদাই আমাদের বড়ো নগরীতে
যাহাতে অমৃত হয় সে-রকম অর্থ, বাচক্লবী,

প্রকাশে প্রয়াস পেয়ে গেছি মনে হয়;
আমাদের নেয় যাহা নিয়ে গেছি তুলে;
নটে গাছ মুড়ে গেছে ব'লে মনে হয়
আমাদের বক্তব্য ফুরুলে।

আবার সবুজ হ'য়ে জুয়ায়ে গিয়েছে
আমাদের সন্তানের সন্তানের প্রয়োজন মতো।
এ-রকম চক্রাকারে ঘুরে গিয়ে কাল

সহসা খিঁচড়ে উঠে খচ্চরের মতন ফলত

অন্য-কোনো জ্যামিতিক রেখা হ'তে পারে;
অন্য-কোনো দার্শনিক মত-বিপ্লব;
জেনে তবু মুখ আর রূপসীর ভয়াবহ সংগম এড়ায়ে
স্থির হ'য়ে রবে নাকি সন্ততির, সন্ততির সন্ততির সব?

যদি তারা টেঁশে যায় করাল কালের স্রোতে ধরা প'ড়ে গিয়ে,
যদি এই অন্ধকার প্রাসাদের ভগ্ন-অবশেষে
শেয়াল প্যাঁচার দিকে চেয়ে কেঁদে যায়,-
তখন স্বপ্নই সত্য; গিয়েছে বস্তুর থেকে ফেঁশে

জীবনের বাস্তবতা সে-সময়।
মানুষের শেষ বংশ লোপ পেলে কে ফিরায়ে দেবে
জীবনের বাস্তবতা?- এমন অদ্ভুত স্বপ্ন নিয়ে
মাঝে-মাঝে গিয়েছি নাগাড় কথা ভেবে।

দুই

সময় কীটের মতো কুরে খায় আমাদের দেশ।
আমাদের সন্তানেরা একদিন জ্যেষ্ঠ হ'য়ে যাবে;
স্বতসিদ্ধতায় গিয়ে জীবনের ভিতরে দাঁড়াবে;
এ-রকম ভাবনার কিছু অবলেশ

তাদের হৃদয়ে আছে হয়তো-বা;- মাঠে-ময়দানে
কথা ব'লে জীবনের বিষ তারা ঝেড়ে ফেলে দিতে চায় আজ;
অপ্লায়ু হিমের দিন ততোধিক মিহিন কামিজে
কাটাতেছে যেন অগণন গিরিবাজ।

সমুদ্রের রৌদ্র থেকে আমাদের দেশে
নীলাভ চেউয়ের মতো দীপ্তি নেমে আসে মনে হয়;
আমাদের পিতামহ পিতারাও প্রবাদের মতো জেনে গেছে;
আমাদেরও ততদূর ভাববিনিময়

একদিন ছিলো,- তবু শোচনীয় কালের বিপাকে
হারায়ে ফেলেছি সেই সান্দ্র বিশ্বাস।
কারু সাথে অন্ধকার মাটিতে ঘুমায়ে,
কারু সাথে ভোরবেলা জেগে- বারো মাস

তাকেও স্মরণ ক'রে চিনে নিতে হয়
সে কি কাল? সে জীবন? জ্ঞাতিভ্রতা? গণিকা? গৃহিণী?
মানুষের বংশ এসে সময়ের কিনারে থেমেছে,
একদিন চেনা ছিলো ব'লে আজ ইহাদের চিনি

অন্ধকার সংস্কার হাৎড়ায়ে, মৃদুভাবে হেসে;
তীর্থে- তীর্থে বারবার পরীক্ষিত হ'য়ে পরিচয়
বিবর্ণ জ্ঞানের রাজ্যে কাগজের ডাঁইয়ে প'ড়ে আছে;
আমাদের সন্ততিও আমাদের হৃদয়ের নয়।

আমরা মধ্যম পথে বিকালের ছায়ায় রয়েছি
একটি পৃথিবী নষ্ট হ'য়ে গেছে আমাদের আগে,
আরেকটি পৃথিবীর দাবি
স্থির ক'রে নিতে হ'লে লাগে

সকালের আকাশের মতন বয়স;
সে-সকাল কখনো আসে না ঘোর, স্বধর্মনিষ্ঠ রাত্রি বিনে।

পশ্চিমে অস্তের সূর্য ধূলিকণা, জীবাণুর উতরোল মহিমা রটায়
পৃথিবীকে রেখে যায় মানবের কাছে জনমানবের ঋণে।

তিন

সারাদিন ধানের বা কাস্তের শব্দ শোনা যায়।
ধীর পদক্ষেপে কৃষকেরা হাঁটে।
তাদের ছায়ার মতো শরীরের ফুঁয়ে
শতাব্দীর ঘোর কাটে-কাটে।

মাঝে-মাঝে দু'-চারটে প্লেন চ'লে যায়।
একভিড় হরিয়াল পাখি
উড়ে গেল মনে হয়, দুই পায়ে হেঁটে
কত দূর যেতে পারে মানুষ একাকী।

এ-সব ধারণা তবু মনের লঘুতা।
আকাশে রক্তিম হ'য়ে গেছে;
কামানের থেকে নয়, আজো এইখানে
প্রকৃতি রয়েছে।

রাত্রি তার অন্ধকার ঘুমাবার পথে
আবার কুড়িয়ে পায় এক পৃথিবীর মেয়ে, ছেলে;
মানুষ ও মনীষীর রৌদ্রের দিন
হৃদয়বিহীনভাবে শূন্য হ'য়ে গেলে।

সেই রাত্রি এসে গেছে; সন্ততির জড়িয়ে গিয়েছে
জ্ঞাতকুলশীল আর অজ্ঞাত ঋণে।
পারাবত-পক্ষ-ধ্বনি সায়াহ্নের, সকালের নয়,
মাঝে এই বেহুলা ও কালরাত্রি বিনে।

চার

এখন অনেক দূরে ইতিহাস-স্বভাবের গতি চলে গেছে।
পশ্চিম সূর্যের দিকে শত্রু ও সুহৃদ তাকায়েছে।
কে তার পাগড়ি খুলে পূব দিকে ফসলের, সূর্যের তরে
অপেক্ষায় অন্ধকার রাত্রির ভিতরে

ডুবে যেতে চেয়েছিলো বলে চ'লে গেছে।

আমরা সকলে তবু সময়ের একান্ত সৈকতে
নিজেদের অপরের সবায়ের জনমতামতে
অনেক ডোডের ভিড়ে ডোডেদের মতো
নেই- তুব র'য়ে গেছি স্বভাববশত।

এই ক্রান্তি জীবন বা মরণের ব'লে মনে হয়।

আকাশের ফিকে রঙ ভোরের, কি সন্ধ্যার আঁধার?
এই দূরত্যয় সিঙ্কু কি পার হবার?
আমরা অনেক লোক মিলে তবু এখন একাকী;
বংশ লুপ্ত ক'রে দিয়ে শেষ অবশিষ্ট ডোডো পাখি,
হ'তে গিয়ে পারাবত-পক্ষ-ধ্বনি শুনি,

না কি ডোডোমির অতল ক্রেংকার।

প্রেম- অপ্রেমের কবিতা

নিরাশার খাতে ততোধিক লোক উৎসাহ বাঁচিয়ে রেখেছে;
 অগ্নিপরীক্ষার মতো কেবলি সময় এসে দ'হে ফেলে দিতেছে সে-সব।
 তোমার মৃত্যুর পরে আগুনের একতিল বেশি অধিকার
 সিংহ মেঘ কন্যা মীন করেছে প্রত্যক্ষ অনুভব।
 পৃথিবী ক্রমশ তার আগেকার ছবি
 বদলায়ে ফেলে দিয়ে তবুও পৃথিবী হ'য়ে আছে;
 অপরিচিতের মতো সমাজ সংসার শত্রু সবই
 পরিচিত বুনোনির মতো তবু হৃদয়ের কাছে
 ক্রমশই মনে হয় নিজ সজীবতা নিয়ে চমৎকার;
 আবর্তিত হ'য়ে যায় দানবের মায়াবলে তবুও সে-সব।
 তোমার মৃত্যুর পরে মনিবের একতিল বেশি অধিকার
 দীর্ঘ কালকেতু তুলে বাধা দিতে চেয়েছে রাসভ।

তোমার প্রতিজ্ঞা ভেঙে ফেলে তুমি চ'লে গেলে কবে।
 সেই থেকে অন্য প্রকৃতির অনুভবে
 মাঝে-মাঝে উৎকণ্ঠিত হ'য়ে জেগে উঠেছে হৃদয়।
 না-হ'লে নিরুৎসাহিত হ'তে হয়।
 জীবনের, মরণের, হেমন্তের এ-রকম আশ্চর্য নিয়ম;
 ছায়া হ'য়ে গেছো ব'লে তোমাকে এমন অসম্মম।

শত্রুর অভাব নেই, বন্ধুও বিরল নয়- যদি কেউ চায়;
 সেই নারী ঢের দিন আগে এই জীবনের থেকে চ'লে গেছে।
 ঢের দিন প্রকৃতি ও বইয়ের নিকট থেকে সদুত্তর চেয়ে

হৃদয় ছায়ার সাথে চালাকি করছে।
 তারপর অনুভব ক'রে গেছে রমণীর ছায়া বা শরীর
 অথবা হৃদয়,-
 বেড়ালের বিকশিত হাসির মতন রাঙা গোখুলির মেঘে;
 প্রকৃতির প্রমাণের, জীবনের দ্বারস্থ দুঃখীর মতো নয়।

তোমার সংকল্প থেকে খ'সে গিয়ে ঢের দূরে চ'লে গেলে তুমি;
 হ'লেও-বা হ'য়ে যেতো এ জীবনঃ দিনরাত্রির মতো মরুভূমি;-
 তবুও হেমন্তকাল এসে পড়ে পৃথিবীতে, এমন স্তব্ধতা;
 জীবনেও নেই কো অন্যথা
 হেমন্তের সহোদর র'য়ে গেছে, সব উত্তেজের প্রতি উদাসীন;
 সকলের কাছ থেকে সুস্থির মনের ভাবে নিয়ে আসে ঋণ,
 কাউকে দেয় না কিছু, এমনই কঠিন;
 সরল সে নয়, তবু ভয়াবহভাবে শাদা, সাধারণ কথা
 জনমানুষীর কাছে ব'লে যায়- এমনই নিয়ত সফলতা।

